

Mancanza da chapientscha directiva

Las intervenziuns da la polizia fruntan sin critica da la cumissiun d'inquisiziun

DAD ANDREAS CADONAU / ANR

■ La cumissiun parlamentara d'inquisiziun na vesa nagina instrumentalizaziun dad uffizis chantunals entras collavuratur da las interpresas involvidas en il cartel da construcziun en l'Engiadina Bassa. Pli critic valitescha la cumissiun l'arrestaziun dad A.Q. entras la grupp d'intervenziun da la polizia chantunala. La cumissiun ha preschentà ses rapport parzial il mardi passà a Cuira. Davos las inizias A.Q. stat probabel il pli enconuscent interpretider da construcziun grischun. Enconuscent dapi sias annunzias vers la cumissiun da concorrenza en connex cun cunvegns da pretsch entaifer la bransch da construcziun en l'Engiadina Bassa e Val Müstair. E las inizias A.Q. èn il fil cotschen dal rapport parzial da passa 250 paginas che la cumissiun parlamentara d'inquisiziun ha preschentà il mardi passà a Cuira. Il rapport parzial tracta trais intervenziuns da la polizia chantunala dals onns 2016 en fin 2017 vers l'interpretider A.Q. e la rolla dad ulteriuras instanzas involvidas, sco il medi districtual, l'autorità per la protecziun da l'uffant e l'uffizi social regiunal. La cumissiun represchentada a Cuira entras la vicepresidenta *Beatrice Baselgia* ed ils commembers *Livio Zanetti*, *Jan Koch* e *Walter Grass* vegn sunter intensivas retschertgas, sco ella scriva en il rapport, tar la conclusiun che ni la polizia chantunala ni ulteriurs uffizis sajan vegnids instrumentalisads da collavuratur dad interpresas involvidas en las cunvegns da pretsch. Las intervenziuns da la polizia chantunala vers A.Q. èn succedidas en connex cun ina procedura da concurs e violenza da chasa suppressida.

Ina taxaziun difficila

Principalmain l'intervenziun dals grenadiers da la polizia chantunala dals 15-6 2017 cunter A.Q. valitescha la cumis-



Tenor il rapport da la PUK sto la lavur da la polizia vegnir meglierada essenzialmain en tscherts regards.

MAD

siun d'inquisiziun a moda critica. In'intervenziun che sa basa sin ina valitaziun persunala dal schef dal post da polizia ch'haja taxà A.Q. sco persuna violenta ed abla per in suicid u in suicid extendi. Ina taxaziun che na saja betg vegnida reponderada u messa en dumonda dals superiors dal schef dal post da polizia. Sin fundament da las infurmaziuns dals grenadiers vesa la cumissiun lur agir per correct. En general dentant vegn la cumissiun a la conclusiun ch'i haja dà intervenziuns illegalas e per part sproportunadas en la libertad persunala dad A.Q. e da sia sora. Illegal saja vinavant stà da liar A.Q. durant il transport en la clinica. Plinavant è la cumissiun era sa fatschentada cun la rolla dal medi di-

strictual stà responsabel per il piazzament per motivs da prevenziun. Sco medi da chasa da la famiglia Q. durant blers onns e pliras giadas involvò en il cas è la cumissiun dal parairi ch'il medi na saja betg stà abel per in parairi independent. Avert lascha la cumissiun dentant la dumonda sch'in ulteriur medi independent avess decis auter en ina situaziun sumeglianta. Tematisà ha la cumissiun era la rolla da l'autorità per la protecziun da l'uffant e da creschids. In uffizi medemamain sta involvò e ch'avessia pli probabel stuì arver ina procedura uffiziala era per segirar la documentaziun da las mesiras e dals divers contacts. Sin fundament da sias enconuschentschas vesa la cumissiun basegns per scolaziun da plirs

uffizis e lur persunal, sco per exempel ils medis incumbensads da decretar in piazzament per motivs da prevenziun. La cumissiun propona dad introducir in management chantunala da smanatschas ed ella pretenda dapli responsabladad directiva tar la polizia chantunala. Ed ella pleda per dapli sensibilitad per dumondas da recusaziun.

Sulet recumandaziuns

Sco quai che la vicepresidenta da la cumissiun d'inquisiziun *Beatrice Baselgia* ha explitgà a Cuira haja la cumissiun sulet l'incarica da proponer mesiras. Introducir pass concrets saja chausa dal cussegl grond e da la regenza grischuna. E la vicepresidenta da la cumissiun d'inqui-

siziun ha medemamain explitgà ses displaschair che la Dretgira chantunala nun haja vuli deliberar la Dretgira regionala da la discreziun professiunala. La Dretgira chantunala haja fatg valair il caracter d'inquisiziun vers l'administraziun da la cumissiun e betg vers la giustia. Tuttina nun ha Baselgia vuli sa distanziar da la constataziun da la cumissiun che ni la polizia ni ulteriurs uffizis chantunals sajan vegnids instrumentalisads davart da las interpresas involvidas en las cunvegns da pretsch. Per displaschair da la vart publicistica da Turitg ch'ha gist costrui in tal scenari en ses rapports en connex cun il cartel e la rolla dad A.Q. e las intervenziuns da la polizia chantunala.

Critica per la polizia – reabilitaziun parziala per Quadroni

Reacziuns sin il rapport da la cumissiun parlamentara d'inquisiziun

DA MARTIN CABALZAR

■ Il rapport da la cumissiun parlamentara d'inquisiziun PUK ha evocà differentas reacziuns. Las partidas politicas sustegnan da principi las conclusiuns da la cumissiun. Per Giuseppe Nay è il rapport ina gronda reabilitaziun e satisfacziun per Quadroni. La Partida socialdemocratica e la Partida burgaisdemocratica vegnan tar la conclusiun: Il rapport che la PUK ha preschentà a las medias mussia mancanzas en la lavur da la polizia che stoppian tant pli spert vegnir tractadas. La ps scriva cler, las controllas internas hajan desditg totalmain en il cas Quadroni. I manchia la documentaziun, cumpetenza e direcziun. Perquai sajan las propostas che la PUK fetschia a la fin da ses rapport immediat da metter enturn. Tenor la ps ston ins bajegiar si in management da periclitaziun complessiv.

Er la pbd sustegna las propostas da la PUK e vesa blers sbagls furmals da las autoritads involvidas. Er ella pretenda che las scuvertas da la PUK stoppian vegnir curregidas immediat e quai cun tuttas consequenzas. La pbd è surlevgiada che l'influenza sugerada da las medias da commembers dal cartel sin la lavur da la polizia chantunala e dal medi districtual na saja apparentamain insumma betg vegnida constatada.



Adam Quadroni è almain parzialmain reabilità tras il rapport da la PUK.

MAD

Era la pcd prenda enconuschentscha cun satisfacziun ch'i na dettia ina cumbinaziun tranter il cartel da construcziun e l'acziun da la polizia. En il medem mument punctuescha la pcd dentant era ch'i stoppia vegnir dà dapli paisa ad ina schubra ed effizienta documentaziun da la procedura administrativa, l'introducziun d'in management da ristg e rinforzà la perfecziun professiunala da la polizia chantunala. Malgrà il sbagls chapitads na dastgian ins betg discreditar pauschalmain la buna lavur da la polizia.

Per Adam Quadroni saja il rapport da la PUK ina gronda reabilitaziun e satisfacziun. Quai scriva la gruppaziun enturn l'antierur derschader federal *Giusep Nay* ch'è s'engaschà per Quadroni. Ella crititgescha dentant che la PUK n'haja betg pudì sclerir puncts centrals perquai che na tut las autoritads hajan cooperà. Percunter mussia il rapport che Quadroni haja ditg la vardad envers ils uffizis e las medias. Perquai spera la gruppaziun che las disfamaziuns cunter Quadroni prendian ina fin.